

**Aningaasanik ikisilluni pinnguaatinut akileraarut pillugu Inatsisartut inatsisaata allan-
ngortinneqarnissaanik siunnersuut**

*Aningaasaqarnermut Nunanilu Avannarlerni Suleqatigiinnermut Naalakkersuisumit saq-
qummiunneqartoq*

pillugu

Akileraartarnermut Akitsuusiisarnermullu Ataatsimiititaliap

ISUMALIUTISSIISSUTAA

Siunnersuutip aappassaaneerreqarnerani saqqummiunneqartoq

Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortaq Niels Thomsen, Demokraatit, siulittaasoq
Inatsisartunut ilaasortaq Harald Bianco, Inuit Ataqtigiit, siulittaasup tullia
Inatsisartunut ilaasortaq Kaali Olsen, Inuit Ataqtigiit
Inatsisartunut ilaasortaq Karl Lyberth, Siumut
Inatsisartunut ilaasortaq Akitsinnguaq Olsen, Siumut

UKA 2010-mi ulloq 28. september 2010-mi siullermeerinerup kingorna ataatsimiititaliap
siunnersuut misissorpaa.

Siunnersuutip imarisaa

Aningaasanik ikisilluni pinnguaatinut pissarsissutaasinnaasunut akileraarut kr. 5.000-inik qaf-
fanneqassasoq siunnersuutigineqarpoq.

Taamaalillunilu aningaasanik ikisilluni pinnguaammut pissarsissutaasinnasumut siuller-
mut akileraarut kr. 64.000-inut qaffanneqassasoq siunnersuutigineqarpoq. Aningaasanik ikisilluni
pinnguaatip pissarsissutaasinnaasup aappaanut akileraarut kr. 70.000-nut tulliinut tamanut kr.
76.000-nut qaffanneqassasoq siunnersuutigineqarpoq.

Taamaalillunilu akileraarut agguaqatigiissillugu 7 %-ip missaanik qaffanneqarpoq.

Siunnersuutip Inatsisartunit siullermeerneqarnera

Ilaatigut siunnersuutip Nunatta Karsianut pitsaasumik sunniuteqarnissaa ilaatigullu inuit ani-
ngaasanoorusussusiannik siunnersuutip annikillisitsisinnanera aallaavigalugu **Inuit Ataqtigiit,
Demokraatit, Atassutikkut Kattusseqatigiillu Partiiata** siunnersuut taperserpaat. Aki-

leraarutiniq qaffaanissaq salliutinagu inuussutissarsiutiniq siuarsaanissap allaffissornikkullu sipaaruteqarnissap salliutinneqarnissaat tunngavilersuutigalugu **Siumup** siunnersuut tapersingilaa.

Ataatsimiititaliap siunnersuummik suliarinninnera

Aningaasanik ikisilluni pinnguaatinut akileraarut kingullermik 2003-mi allanngortinneqarsimamat ataatsimiititaliamit oqaatigineqassaaq. (Aningaasanik ikisilluni pinnguaatinut akileraarut pillugu Inatsisartut inatsisaata allanngortinneqarneranik Inatsisartut inatsisaat nr. 15, 7. november 2003-meersoq). Akinik iluarsiiussummut naleqqersuut piffissami 2003-mit 2010-mut 16 %-it missaannik qaffariarsimasoq Naalakkersuisut paasissutissiisutigaat. Taamaalillunilu akinik iluarsiiussummut sanilliullugu akileraarutip piffissami 2003-mit 2010-mut 16 %-it missaannik mangiarneqarneranik aningaasanik ikisilluni pinnguaatinut akileraarutip qaffanneqarsimanninnera kinguneqarsimasoq ataatsimiititaliamit oqaatigineqassaaq.

Siuliani – siunnersuutip imarisaata ataani – allassimasutut akileraarutip qaffaatissatut siunnersuut agguaqatigiissillugu 7 %-ip missaannik qaffaanermik kinguneqassaaq. Siunnersuut piviusunngortinneqarpat suut tamaasa isigalugit akileraarut 2003-mut sanilliullugu suli 9 %-it missaannik appasinnerussaaq. Taamaattumillu qaffaatissatut siunnersuutigineqartut annertunngitsutut oqaatigisariaqarlutik.

Tunngaviusumik isigalugu akileraarutit 2003-milli ingerlaavartumik iluarsiiusuteqarfigineqartarsimanninnerat pitsaanngitsutut ataatsimiititaliamit isigineqarpoq. Iluarsiiusuteqartarsimanninnerup kingunerivaa Nunatta Karsiata isertitassaasa piffissap ingerlanerani mangiarneqartarsimanagerat. Taamaattumillu akinut iluarsiiusut aqputigalugu akileraarutip siunissami iluarsiiusuteqarfigineqartarlernissaa allatulluunniit ingerlaavartumik iluarsiiusuteqartalernissap qulakkeerneqarnissaa naapertuutissanersoq isumaliutigeqqullugu Naalakkersuisut qinnuigineqarput. Tassunga atatillugu Naalakkersuisunit isumaliutigineqartut pillugit ilisimatinneqarnissani ataatsimiititaliap kissaatigaa.

Siunnersuuttip aningaasaqarnikkut kingunissai

Aningaasanik ikisilluni pinnguaatinut akileraarutip qaffaatissatut siunnersuut aningaasanut inatsiseqarfiusumi 2011-mi ukiumut 900.000 kr.-it missaannik ukiunilu missingersuusiorfinni ataasiakkaani tamani taakku amerlaqataannik Nunatta Karsianut isertitaqaataasussatut naatsorsuutigineqartoq, taamaalillunilu aningaasanik ikisilluni pinnguaatinut ukiumoortumik akileraarut tamakkiisoq 12 mio. kr.-it missaannik annertussuseqassasoq ataatsimiititaliamit maluginiarneqarpoq. 2011-mi aningaasanut inatsisissatut siunnersuummi konto pingaarneq 24.11.17, Aningaasanik ikisilluni pinnguaatinut akileraarutitut tunngasoq, innersuusutigineqarpoq.

Ataatsimiititaliap inassuteqaatai

Tamanna tunngavigalugu siunnersuut akuerineqassasoq **amerlanerussuteqartut** Inuit Ataqtigiit Demokratillu inassutigaat.

Ataatsimiititaliami ikinnerussuteqartut Siumumeersut siunnersuut pillugu ima oqaaseqarumapput:

Akilerarutiniq qaffaanissaq salliutinnagu inuussutissarsiutiniq siuarsaanissaq allaffissornikkullu sipaaruteqarnissaq salliutinneqartariaqartut **Siumut** isumaqarpoq. Tamannalu tunngavigalugu siunnersuut itigartinneqassasoq Siumup inassutigaa.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.

Niels Thomsen, Siulittaasoq

Harald Bianco

Kaali Olsen

Karl Lyberth

Akitsinnguaq Olsen